

17 NOIEMBRIE

**ACATISTUL
SF. CUVIOS
NICON
DE LA RADONEJ**

ACATISTIER-RU



АКАФИСТ

преподобному Никону, игумену Радонежскому

Кондак 1

Избранный Божественныя Троицы угодниче преславный, монашеских заветов Сергия чудотворца рачителю, духоносный наставниче христианскаго благочестия, яко добре упасл еси стадо словесных овец, в деяниях был еси правило веры и образ кротости, изряднейший храмоздателью обители Троицкия, темже с любовью и благодарением вси зовем ти:

Радуйся, Никоне, Радонежский и всея России чудотворче.

Икос 1

Ангельское житие возревновал еси, слыша о преславнем игумене Радонежския обители Животворящия Троицы авве Сергии, к немуже направил еси стопы своя из града Юрияпольска, яко аще и юн бе, всею душею возжаждал еси узрети лице чудотворца и умолити его, да примет во общники ученик своих и яко добрый пастырь да управит путь в Царствие Небесное, идеже есть всех веселящихся о Господе жилище. Темже мы восхваляем тя, поюще:

Радуйся, от юности житие во Христе
возлюбивый;

Радуйся, душу ветхаго человека в себе
умертвивый.

Радуйся, нищету духовную ради Царствия
Небеснаго избравый;

Радуйся, в плачи души своея по Бозе
утешение улучивый.

Радуйся, кротость аввы Сергия
унаследовавый;

Радуйся, алчущим и жаждущим правды
Божия последовавый.

Радуйся, милосердием к страждущим
милости от Бога себе испросивый;

Радуйся, чистым сердцем Бога в Троице
славимаго умиленно созерцавый.

Радуйся, Никоне, Радонежский и всея России
чудотворче.

Кондак 2

Видя суету сует мира сего во зле лежащаго,
скорогибнущую красоту его и прелесть земных
благ, тлению причастных, яве отринул еси,
восхотел бое си, яко верный и благий раб,
единому Господеви неленостно поработати, в
радости воспевая Ему: Аллилуиа.

Икос 2

Разумом, от Духа Святаго просвященным,
провидя твое Богоугодное житие, посла тя

богомудрый Сергей в обитель Высоцкую к ученику своему Афанасию, мужу zelo добродетельному, да испытает душу твою в любви ко Христу и в ревности к подвигом иноческим, иже и даудостоит тя приятия монашескаго чина. Сего ради зовем ти:

Радуйся, верою измлада прямыми стезями пред Богом ходивый;

Радуйся, в надежди жизни вечныя стопы своя горе направивый.

Радуйся, любовью ко Христу сердце свое сладце уязвивый;

Радуйся, ревностию к житию монашескому многия удививый.

Радуйся, обета послушания доблий исполнителю;

Радуйся, чистотою целомудрия храма души своя украсителю.

Радуйся, яко стяжанием Духа Святаго вся блага мира сего презрел еси;

Радуйся, яко нищету Христову паче злата и сребра возлюбил еси.

Радуйся, Никоне, Радонежский и всея России чудотворче.

Кондак 3

Силою свыше осеняемый, возшед на гору монашескаго преспеяния, вся козни душетленнаго велиара диаволя разрушил еси и,

внегда достиже меру возраста, премудрости и разума, возжелал еси возвратиться к отцу своему духовному Сергию, да примет тя в свою обитель и причтет боголюбивой братии ея. И сей пастырь добрый абие прият тя. Видев же духовныма очима благодать, яже в тебе, отче Никоне, в радовании возгласи Богу: Аллилуиа.

Икос 3

Имея крепкое произволение о спасении души своея, всеконечно предался водительству Богомудраго учителя монашескаго делания Сергия, иже узрев твое усердие подвизатися в трудех поста и молитвы, содела тя своим возлюбленным сотаинником. Мы же, воспевая величие подвигов твоих, взываем ти сице:

Радуйся, равноангельнаго жития подражателю;

Радуйся, бисера и Царства Небеснаго усердный искателю.

Радуйся, Господу Домовладыце яко верный и благий раб послуживый;

Радуйся, всю надежду на спасение души своея на Бога возложивый.

Радуйся, всего себе отцу духовному покоривый;

Радуйся, ко Граду Небесному по стопам его благосествовавый.

Радуйся, многих даров Богомудраго аввы

сопричастниче;

Радуйся, присный его в богомыслии
собеседниче.

Радуйся, Никоне, Радонежский и всея России
чудотворче.

Кондак 4

Бури житейских волнений непричастен был
еси, егда вселился еси в тихое пристанище
обители Радонежския. В подвизах же
неустанных, яко финикс процвел еси, восходя,
Богу благодатию вспомошествоующу, от силы в
силу, и се, авва Сергей, иже в немощи возраста
тогда суща, возложи на тя, яко на преемника,
водительство стада Христова. Ты же смиренно
восприял еси крест чиноначалия и тако преспел
еси с благодарением зовый Господу
Пастыреначальнику: Аллилуиа.

Икос 4

Слыша народ православный о блаженней
кончине великаго аввы Сергия, возскорбеша
зело, яко лишени быша вси таковаго духовнаго
наставника и чудотворца. Обаче утешени быша,
видяще достойнаго и добронравнаго ученика
его, иже по послушанию понесе многия труды
окормления стада Христова. Сего ради
воспеваем ти, в радости зовуще:

Радуйся, страсти житейскаго мира
победивый;

Радуйся, вся заповеди Христовы
исполнимый.

Радуйся, на гору совершенства духовного
возшедый;

Радуйся, многих даров Божиих
удостоивыйся.

Радуйся, Сергия аввы достохвальный
наследниче;

Радуйся, игуменства его многорачительный
преемниче.

Радуйся, Лозы Христовы розго многоплодная;
Радуйся, ниво, в добродетелех плодородная.

Радуйся, Никоне, Радонежский и всея России
чудотворче.

Кондак 5

Боготечней звезде подобяся, светом
благодати Божия яже в тебе, озарял еси путь к
Царствию Небесному приходящим к тебе с
верою и надеждою на спасение. Мнози бо
труждающиеся и обремененнии осуетишася в
земных попечениях и в уныние впадоша,
познавше же тя, яко мудраго наставника и
путеводителя в обители небесныя, со тщанием и
верою течаху к тебе, в радости поюще Богу:
Аллилуиа.

Икос 5

Видя подвиги иноков стада своего, несущих
иго Христово в кротости и смирении, вседушно

радовался еси их преспеянию; обаче скорбел и слезно молился еси о нецых, иже в лености и нерадении сущих, да не погубит их до конца враг спасения, яко лев рыкающий, ища кого поглотити. Мы же дивимся твоей ревности душепопечительства о братии с умилением поем тебе:

Радуйся, жития в подвизах монашеских смиренный наставниче;

Радуйся, братии во Христе кроткий чиноначальниче.

Радуйся, усердный сеятелю евангельскаго учения;

Радуйся, добрый делателю пастырскаго душепопечения.

Радуйся, противу духов злобы мужественный воителю;

Радуйся, темных сил ада доблестный победителю.

Радуйся, яко тобою стадо словесных овец умножается;

Радуйся, яко тебе ради потоцы Божия благодати на него источаются.

Радуйся, Никоне, Радонежский и всея России чудотворче.

Кондак 6

Проповедник великих монашеских подвигов и богодухновенных заветов своего учителя,

блаженнаго Сергия, был еси, во всех трудех со
тщанием подражая ему, в поте же лица
воздѣлывал еси духовный вертоград, врученнѣй
ти аввою, еще живу ему сущу, и тако добрии
плоды собирал еси во времена своя, услаждая
всех и поя Богу: Аллилуиа.

Икос 6

Возсия по лицу всея земли Русския слава
Радонежския обители, в нюже яко в вертоград
сладостный тече множество ищущих помощи в
бедах и напастех, иже обретоша тамо надежду
на молитвы твоя и теплое ходатайство пред
Престолом Царя Небеснаго. Темже познаша тя
скораго помощника в земной юдоли и в радость
приидоша, с умилением тебе поюще:

Радуйся, истинный подвигов своего аввы
последователю;

Радуйся, всех его духовных завещаний
исполнителю.

Радуйся, монашескаго устава неотступный
блюстителю;

Радуйся, к совершенству иноческих
добродетелей путеводителю.

Радуйся, плевел на ниве Божией
искоренителю;

Радуйся, винограда Христова искусный
насадителю.

Радуйся, яко тобою Радонежская пустынь

славно распростанися;

Радуйся, яко тобою Церковь Русская
возвеселися.

Радуйся, Никоне, Радонежский и всея России
чудотворче.

Кондак 7

Хотя глубиною Промысла вся строити и
лучшее всем даяти, избра ты Господь, яко
сподвижника аввы Сергия, достойным его
преемником и пастырем на пажитех
Радонежских быти. Ты же яко добрая свеща,
горел еси духом веры и неусыпно поучал еси
стадо словесных овец, во еже ходити в
заповедех Господних, со страхом и трепетом
совершая служение Богу Вседержителю, да и
тии с сыновним благодарением всегда славят
пречестное и великолепое имя Святыя
Живоначальныя Троицы, поюще: Аллилуиа.

Икос 7

Новаго заступника пред Престолом Божиим
узрев ты вся страна Русская, яко воистинну в
тебе милость и истина сретостесе, правда и мир
облобызастесе, и введуще ты, таковаго душею
пред Триединым Богом, могущаго умоляти Его,
да вси едины будут, якоже заповедал великий
авва Сергий, служитель Троицы. Темже
благодарне зовуще, поем ти:

Радуйся, народа страны Российския

неусыпный хранителю;

Радуйся, прибегающих к тебе в час злых нападений вражеских защитителю.

Радуйся, многия заблуждшия овцы от греховнаго пути обративый;

Радуйся, множества страждущих печаль в радость превенивый.

Радуйся, ненавистную рознь среди единоплеменников возбранивый;

Радуйся, вожделенное единение среди них во имя Троицы насадивый.

Радуйся, всем житием своим Троицу Единосущную прославивый;

Радуйся, во имя Ея паству свою единомысленно жити наставивый.

Радуйся, Никоне, Радонежский и всея России чудотворче.

Кондак 8

Странное отшествие твое в затвор видевшие братия, зело возскорбеша, яко овцы без пастыря пребываху, дондеже дадеся ей един от них благоговейный Савва, обаче и той вмале остави игуменство по смирению. Тогда иноцы умолиша паки блаженнаго Никона стати их путеводителем, в радости поюще Богу, вся во благо устрояюще: Аллилуиа.

Икос 8

Вся грады и веси Русския смятошася, егда бысть нашествие безбожных агарян. Такожде страхом и трепетом объята бысть Радонежская обитель от грядущаго злострадания, якоже и святыи Сергий со двема святителема Петром и Алексием в явлении тебе, преподобне Никоне, предрече вскоре быти разорению обители, обаче да не впадет кто во уныние, понеже последи паки процветет сия обитель паче прежняя. Сего ради вопием ти:

Радуйся, безмолвие затвора зело возлюбивый;
Радуйся, всю надежду на волю Божию возложивый.

Радуйся, яко во дни тяжких испытаний никакоже в уныние впадал еси;

Радуйся, яко братию в часы лютых искушений никакоже оставлял еси.

Радуйся, откровения свыше о судьбе обители удостоивыйся;

Радуйся, добраго обетования о ней сподобивыйся.

Радуйся, в крепком уповании на Промышление Божие покой обретая;

Радуйся, благодарение Господу за вся испытания незабвенне возсылая.

Радуйся, Никоне, Радонежский и всея России чудотворче.

Кондак 9

Все упование возложив на помощь Небесную по отшествии зловредных иноплеменник, паки собрал еси свою братию на место, идеже врази дерзнуша сожещи обитель, и мнози труды положил еси, да возродится оная ради спасения иноков, жаждущих подвигов благочестия: И, о чудесе! Скоро число насельников обители умножишася. Дивяся же сему Божию попечению, воспел еси в радости: Аллилуиа.

Икос 9

Витии многоглаголивии не могут изрещи силу твоих подвигов, имиже неустанно славил еси Живоначальную Троицу, во образ любве триех лиц Ея Отца, и Сына, и Святаго Духа, насаждая добродетели христианския любве, смирения и послушания посреде братии, подражая избраннику и служителю Святыя Троицы великославному Сергию. Мы же, хваляще твою ревность, яже по Бозе, с благодарением зовем ти:

Радуйся, Живоначальныя Троицы храме одушевленный;

Радуйся, многих даров, свыше ниспосланных сосуде благоуханный.

Радуйся, в служении Святей Троице аввы Сергия сотаинниче;

Радуйся, в почитании Ея имени братии своя

чудный наставниче.

Радуйся, яко чистотою сердца тайну
Божества Троицы созерцал еси;

Радуйся, яко глубиною веры души своея
любовь тричисленных лиц Ея познавал еси.

Радуйся, яко безмолвным Богомыслием
точию горняя, а не земная помышлял еси;

Радуйся, яко Царствие Божие, аки вечную
красоту, внутрь сердца восприял еси.

Радуйся, Никоне, Радонежский и всея России
чудотворче.

Кондак 10

Спасти хотя душу свою, плоть свою распял
еси со страстьми и похотьми, и яко столп,
досязаяй небес, светил еси во тме ноци до края
земли Русския: вси бо страждущии и
обремененнии течаху к тебе с верою, яко к
скоропослушному помощнику и дерзновенному
ходатаю пред Престолом Святыя Троицы,
воспевающе Ей со умилением: Аллилуиа.

Икос 10

Стена обретесе всем с верою к тебе
прибегающим, не чужд был еси братии своей, но
послужил ей еси яко раб во спасение души, тем
быв образ смирения и послушания. Устрояя же
обитель яко дом Животворящия Троицы по
завету своего отца преблаженнаго Сергия, в
похвалу его воздвигл еси церковь прекрасну в

Ея Трисвятое Имя, призвав вящих строителей камнесечцев и искуснейших иконописцев Даниила и Андрея. И тако бысть сия церковь невреда и донне, яко чудесе Богом хранимая. Мы же, достойно и праведно покланяющеса Троице Единосущней и Нераздельней на месте сем, поем тебе песнь хвалебную:

Радуйся, великоименитый Единосущный Троицы проповедниче;

Радуйся, славы Ея неизреченный исповедниче.

Радуйся, в безмолвной молитве Божественный Троицы тайнозрителю;

Радуйся, преподобного Сергия, служителя Святыя Троицы, ревностный последователю.

Радуйся, всех монашеских обетов благоговейный хранителю;

Радуйся, на камени веры храма души своея истый зиждителю.

Радуйся, яко незыблемую надежду на Бога спасался еси;

Радуйся, яко в Царствии Небеснем диадимомою любви венчался еси.

Радуйся, Никоне, Радонежский и всея России чудотворче.

Кондак 11

Пение всеумиленное приносим ти, отче Никоне, взирающе на твое богоугодное и славное житие. Познав прехождение и тщетность временнаго мира сего, чести и земныя славы не искал еси по заповеди своего учителя, но прежде всего имел еси страх Божий и память смертную, смирение же с покорением, пост и молитву. Страннолюбие не забывал еси, поминая паче всего час смертный и Второе Пришествие. Мы же взирающе на образ твоего дивнаго жития, в радовании поем Богу Человеколюбцу: Аллилуиа.

Икос 11

Светозарною звездою возсиял еси на своде небеснем, егда скончал еси земное странствие и преселился еси в обители Царствия Небеснаго, иже уготовани быша всем любящим его. И ныне радуешься и веселишися, яко мзда твоя многа на Небеси. Мы же, чада твоя, с любовью и благодарением чтим святую память твою, с верою притекающе к честней твоей раце, и тамо с благоговением приемлем просвещение, освящение и очищение душ наших, благодарственно поюще:

Радуйся, яко подвигом добрым неослабно подвизался еси;

Радуйся, яко течение узкаго, многоскорбнаго

земнаго пути скончал еси.

Радуйся, яко веру непоколебиму в Бога, в
Троице славимаго, соблюл еси;

Радуйся, яко венец правды, уготованный
Мздовоздаятелем Богом, восприял еси.

Радуйся, лестницею духовною, восходя от
силы в силу, к вратам рая возведенный;

Радуйся, в блаженный покой Иисусом
Христом введенный.

Радуйся, тамо не вечерним светом
осияваемый;

Радуйся, вечною славою Царя царей и
Господа господей озаряемый.

Кондак 12

Благодати Божия исполнися храм души
твоя, и сию сугубую силу свыше, яко милоть
древле пророк Илия ученику своему Елиссею,
так о ниспосла тебе Сергей чудотворец по
отшествии своем в горний мир ходатайством
пред Престолом Святыя Троицы, и явися тобою
храм назданный, яко ковчег заветов Сергиевых,
в немже его цельбоносныя мощи аки скрижали
глаголов великаго аввы даровани суть всем,
чтущим его святую память, в благодарении
зовущим Богу: Аллилуиа.

Икос 12

Поюще твое предстательство пред Престолом
Присносущныя Троицы, веруем, яко не

забудеши нас, убогих, до конца, по преселении бо в чертоги Царствия Небеснаго твориши чудеса, заблудших вразумляя, недугующих исцеляя, бесных свободя, и вся полезная нам даруя. Приими наше благодарение, согласно пощих ти:

Радуйся, стезею Евангелия от земли к Небеси возшедый;

Радуйся, крест монашескаго жития безропотно понесый.

Радуйся, иго Христово на рамена своя ничтоже сумняся возложивый;

Радуйся, бремя Свое Иисус в легкосту в тебе преложивый.

Радуйся, яко вечное наслаждение ныне обретаеши;

Радуйся, яко Троицу со Ангелы и всеми святыми присно прославляеши.

Радуйся, яко дерзновением молитв пред Нею о всех, нас чтущих тя, утешаеши;

Радуйся, яко нас, в мори житейском обуреваемых, окормлением не оставляеши.

Радуйся, Никоне, Радонежский и всея России чудотворче.

Кондак 13

О пречудный молитвенниче и преславный Божий угодниче! Приими сие прилежное наше моление. Испроси у Человеколюбиваго Христа

Бога нашего веры православныя утверждение,
делом милосердия преспеяние, недужным
исцеление, согрешением нашим прощение, на
Страшнем Суде добраго ответа возвещение, да
все вкупе воспоем Ему: Аллилуиа.

***Этот кондак читается трижды, затем
икос 1-й и кондак 1-й***